


2089

Warhafftige Neme

Zeitung / von dem Grossmechtigen König zu
Franchreich / wie seine Königliche Maiestet / zu Paris /
im Thurnier / von einem Edelman / vnd Capitan besche-
diget worden / den xi. tag des Hermonats / dieses
Neun vnd Funffzigsten Jars / durch ein zu-
schlagendt tödlich Fieber / in Gott
selig verschieden.



AN. D. LIX.



Es ist der Herzog von Alba / der Prinz von Acainen / Graff von Egemont / mit vielen Herren vom Adel / vnd ansehenlicher gesellschaft wol ausgeputzt / als Geisler / den 6. Junij von Brüssel nach Franckreich gezogen. Nach dem aber ich dem Herzogen von Saphoi mit hinein zu ziehen zugesagt / so habe ich mich allgemach mit obgenantem Duca de Alba / vnd denselbigen Herren vorhin auff den weg gemacht / seind also den 10. Junij zu Pern auff den Franztösischen Frontier ankommen / alda von dem Franztösischen Allmirant / sampt andern viel Franztösischen Herren / städtlich angenommen / vnd folgendts nach Parys gefüret worden / haben vnter wegen in des Connestabel zwey Heuser / Schantely vnd Equam genandt / gelegen / alda vns städtlich vnd gute ausrichtung geschehen / vnd gantz wol tractirt worden / habe dergleichen von zierlichen geberden / lusten vnd herligkeiten / nicht viel mehr gesehen.

Folgendts sind wir den 14. zu S. Dionysi / ein gar schöne reiche Aptey / dem Cardinal von Lottringen zugehörig / kommen / vnd alda benachtiget. Vom selben Cardinal / neben andern mehr Cardinalen / vnd ein grosser anzahl Prelaten vnd der Geistlichen / herrlich entpfangen vnd gar wol verhalten worden.

Den 15. sind wir nach Parys gezogen / da der König von Franckreich / den Herzog von Lottringen / sampt vielem Hoffgesindes / vns entgegen geschickt / annemen / einleiten / vñ gegen Hoff führen lassen. Vnd nach dem Duca de Alba / vnd wir andern abgestiegen / zu ihrer May. hinauff gegangen / Ist der Delphin an die Treppen / vnd der König bis an die Saalthür / obgenandten geislern vnd gesandten / entgegen gangen / dieselbigen vnd andern von der Kön. Mayest. vnd dem Delphin freundlich vnd gnediglich / neben grosser ehrerbietung / entpfangen. Als haben die Geisler ire Credentzschriff dem König vbergeben / ihre werbung ausgericht vnd darnach zu der Königin vnd der selbigen Tochter / so dem König zu

nig zu Spannen vermahlet/ in einen andern Sahl gefüret/ vnd nach verrichtung ihrer werbung vnd auffgelegten befehlich/ ein jeder wider nach seiner herberge gezogen.

Vom 16. bis auff den 18. Junij/ haben die Kön. May. den gesandten vnd vns andern/ allerley kurtzweil mit Tanzen/ balspiel/ pferdthumeln/ vnd allem dem/ wes zu blesometen vnd freunden dienet/ nicht allein wie ein König/ sondern auch wie ein gut gesel/ gepflogen/ vnd sich gegen vns verhalten.

Den 18. sind die gesandten/ vnd mehr denn freundlich vnd gnediglich/ wir alle neben dem Könige/ in grosser anzal Geistlichen vnd weltlichen Fürsten vnd Herren/ der König zu Frankreich/ mit viel Trommeten/ hoffirn vñ heropdem/ in die Kirche Notradama gezogen/ für den hohen Altar geführt/ daselbst der König den Gesandten/ an stad der Kön. May. zu Spannen/ für einem Crucifix/ den Frieden vnd Vortragk/ mit einem leiblichen Kyd betressiget.

Nach dem hat der König die Gesandten mit sich zur mahlszeit in Pallast genommen/ nach dem Essen in ein ander Palladin geführt/ vnd abermals einen Königlichen Tanz gehalten.

Von dem 18. bis auff den 22. Junij/ hat man abermals mit freuden allerley kurtzweil/ wie obgemelt/ gehabt. Ich bin aber dem Herzogen von Saphoi aus Parys auff ein bahr tage entgegen geritten/ Vnd ist denselben tag/ als den 22. Junij/ der Herzog von Saphoi/ mit anderthalb Hundert Pferden/ auff der Post neben stadelichen Herren/ Königliches zu Hispanien Hoffgesindes/ in schwarz Sammet bekleidet/ mit gülden/ posament belegen/ vnd wol ausgeputzt/ gegen Parys kommen/ vnd vngesehrlich auff ein bahr Bücksen schösse für der Stadt/ ist der Herzog von Orbiens/ mit einer grossen anzal Französischen Hoffgesindes/ dem Herzogen von Saphoi/ entgegen geritten kommen/ ihn angenommen/ vnd mit sich in den Pallast gefüret/ alda abgestiegen/ vnd der König dem Herzogen/ bis auff die stiegen entgegen gangen/ ganz freundlich entpfangen/ vnd als dann in sein Kammer folgends

gends zu der alten Königin/ vnd der Königin zu Hispanien/ vnd seiner vermahleten des Königes Schwester/ geführt/ von denen er auch ganz herrlich empfangen/ vnd ein freundlich gesprech gehalten. Vnd als bald denselbigen tag/ vnd zur selben zeit/ auch an dem orth im Pallacio/ ist dem Duca de Alba/ an stat vnd im namen des Königs zu Hispanien/ durch den Cardinal zu Lottringen des Königs von Franckreichs Tochter/ in gegenwerth des Königs von Franckreich vnd aller Herren/ so wol der ausswertigen vnd frembden/ als der Franzosen/ sampt dem ganzen Königlichem/ vnd deren viel mehr in mechtiger anzal/ frawenzimmer/ öffentlich zugesagt/ gegeben vnd vertrauet worden/ vnd alle ding nottürfftiglich abgeredet/ Darauff der König mit seiner Tochter der Braut/ getanzt/ vnd als denn zu Tische gesessen/ vnd mit ihrer May. die 5. gesandten/ vnd der Herzog von Saphoy/ sampt allen den Herrn/ so mit ihm kommen/ mit vber der Königlichen Tafel gesessen vñ gessen/ nach essens wider getanzt vnd frölich gewesen.

Folgendes tages/ als den 23. Junij am Brauttage/ ist der König mit dem ganzen Hoffgesinde in ein ander Pallatium vorrücket/ alda/ nach altem gebrauch/ vber den langen marmelsteinen Tisch nachtmal gehalten/ niemands mit irer Kön. May. gessen/ als die weibs personen/ so vom geblüt vnd stam von Franckreich sind gewesen/ sampt den Cardinelen vnd die/ so auffgewartet/ vñ zu tisch gedienet/ sind manspersonen auch von rechtem geblüte vnd kunst Franckreich gewesen/ Vnd der Connestabel mit seinem gehörigen stabe/ sampt zwölff Hoffmeistern/ für dem essen gangen/ nach dem nachtmal getanzt/ vnd in tanzen der König selb sechs/ in einer schönen herrlichen Mummerey komen/ Vnd wie solchs vollendet/ die Braut dem Duca de Alba/ an stat des Königs von Hispanien beygesetzt/ vnd der Duca de Alba der Braut/ nach gebrauche/ an ein bein gegriffen/ vnd eine hose/ die sie pflegen zu tragen/ ausgezogen.

Dem Grafen von Egemont aber ist zeitung kommen/ das sein Gemahl etwas hart schwach sey/ hat ihm der König auff sein ansuchen erlaubet/ vnd ist von Parys abgeritten.

Vom 23. bis auff den 28. Junij/ hat man allerley kurtzweil/
(wie obgemelt) auch mit teglichem bereiten fürgenommen. Den 28.
vmb 6. vhr gegen abendt/ ist der Delphin vnd der Herzog von
Lothringen/ sampt etlichen von den fürnembsten Herrn der Kron
von Franckreich/ vngesehrlich bis in 34. wolgeputzt/ mit fremb/
der selzamer inuention/ sampt den jenigen/ so zu Ross vnd fuss
auff sie gewartet/ gantz lustiglich zusehen/ wol ausgestrichen/
auff die bahn gezogen/ alda ein jeder sein wapen für sich führen/
vnd mit bringen müssen/ dieselben öffentlich auffgehendct/ vnd
sich als morgen oder folgendes tages/ zu rennen/ bey den Rich/
tern ausgegeben.

Der alt König/ der Herzog von Guisa/ der Prinz von Fer/
rar/ vnd der Herzog von Namuhr/ sind beruffer des rennens ge/
wesen/ menniglichen Ritterstands/ wie breuchlich/ zubestehen. Ist
also den 29. der Delphin selb 22. wol ausgerüst vnd stadlich ge/
putzt/ auffgezogen/ Vor jm aber ein schön schiff gantz vnd gar/
sampt dreyen Mastberomen/ in vnd auswendig alles mit rothem
sammet vberzogen/ die Siegel von silbern zindel/ alle strick vnd
Tackel/ was zum Schiff gehöret/ von vntzen golde zubereitet/ die
Schiffleute mit braunen sammet bekleidet/ vnd viel andern herr/
lichen Spectakeln/ vber die bahn hin/ als für winde gesiegelt. Vnd
bald darauff die vier beruffer/ darunter der König selbst gewesen/
mit einem jeden/ so wider sie auffgezogen/ fünff treffen gethan/
alda für jedermenniglich/ vnd für den Königlichen Frawenzim/
mer/ in grosser anzahl/ viel guter treffen geschehen/ vnd derselbe
tag glücklich vnd wol geendet/ vnd nach der abendt mahlzeit wi/
derumb ein herrlicher Tanz gehalten/ Ehe aber der Tanz gehal/
ten/ hat man dem Herzogen von Saphoi/ in solcher vnd nicht
viel weniger gestalt/ wie oben vom Duca de Alba gemeldet/ des
Königes Schwester versprochen.

Den 30. tag ist der König/ sampt den dreyen Fürsten vorge/
melt/ selb vierd abermals/ als beruffer des Rennens/ mit König/
licher zier auff die bahn gezogen/ erwartende menniglichen Ritter
standes/ wie gestriges tages/ zu bestehen vnd auszuwarten/ Wie

auch solchs ritterlich angefangen/ vnd viel tapffere treffen geschehen/ vnd allezeit eine parthey nach der andern auffgezogen/ also das der Connestabel sich habe bedüncken lassen/ dieweil ohne das ein warmer tag/ vnd der König vber sein vermügen der sachen etwas zu viel thete/ hat er in vnterthenigkeit die Kön. May. gebeten/ ihre May. wöllen für ihre person ein auffhören machen/ vnd sich in ruhe begeben/ mit erinnerung des gestrigen ausgestandenen arbeit ic. Auch vber das ihrer May. in den Spies gefallen/ vnd keines ferners rennen gestatten wöllen. Er aber der König gesagt/ Er habe allbereit vier Currir gethan/ den fünfften wölle er dem Herzogen von Saphoi zu gefallen vnd willen thun / vnd als bald des Constabile Sohn zum Herzogen von Saphoi geschickt/ mit anzeigung/ Nach dem er gestriches auch heutiges tages bis anher/ sich in solchem Ritterspiel nicht mit geringer mühe vnd arbeit habe gebrauchen lassen/ vnd schon vier Currir geendet/ so wölle/ er der König/ vmb des Herzogen zu Saphoi willen/ noch den fünfften auch für die hand nemen.

Welches ihre May. also fürgenommen/ vnd mit einem ihres Hoffgesindes einen Capitan/ vber die Guardie dermassen ein hart treffen gethan/ das der Edelman vnd Capitan seinen Spies dem König auff der brust gebrochen/ vnd mit dem strumpff durchs Diester/ zwischen beiden augen auff der stirn hinein gerandt/ das es also vber ein auge ausgewischt/ vñ der König des harten stoffes entpfunden/ danon gewancket/ vnd durch einen ihrer May. buben beim schenckel erwischt vnd gehalten/ bis so lang der Connestabel vnd andere grosse Herren/ so ihr Kön. May. vom Ross auff einen stuel zusitzen bracht/ das Helmlin eröffnet/ den schaden gesehen/ vnd das Helmlin voller bluts befunden/ ihre May. auff dem stuel nach dem Pallast für der Königin vnd ganzem Königlichen Frauenzimmer vnd aller welt/ so da auff dem platz gewesen/ getragen/ Da hat sich noth vnd jammer erhoben/ das die Königin für grossem leidt/ ihre Kleinodien/ Königliche zier vnd schmuck/ auch ire kleider vor amacht vom leib gerissen/ desgleichen das an
der

der Königlich Frauenzimmer / gros jammer vnd leid gestellet/
Item/der Delphin für leidt vnd vnnuth / zween hat vom platz
führen lassen. Die vbrigen vnd alle personen/so zu diesem Ritter
spiel auffgezogen/ mit grosser betrübnis/sampt den Trommetern/
stillschweigents abgezogen/ vnd also dermassen ein jammer/klag/
vnd leid fürgefallen/ danon nicht genugsam zu schreiben. Wie
aber der König in sein Kammer gebracht/ vnd verbunden solte
werden/vnd die Königin auch darzu kam/ hat er trincken begert/
vnd darauff gesagt/ Er habe je vnd allzeit nach gestellet/ wie er in
Kriegen für sein Land vnd Leute ehrlich / riterlich vnd mannlich
sterben möchte/ aber es habe jm nicht widerfahren mügen/Das ihn
aber vnser Herre Gott solcher gestalt den Todt aufferlegt/ dem
solt er befohlen sein/vnd sein Göttlicher wille geschehe.

Nach dem ich aber desselbigentages etliche stunden zuvor ihr
Kön. May. auff die bahn gezogen/ vrlaub vnd meinen abschiedt
vom König genomen/ den auch vmb meinen obliegenden dienst
ganz gnediglich erlangt/ bin ich Sonnabends den letzten Junij/
gegen abend mit dem Graffen vom Horn/ vnd andern hie abpos-
tirket.

Heut Dato den 12. Julij kompt Post / das der König zu
Franchreich durch ein zuschlahend sieber zu diesem schaden/dins-
stag den 11. Julij mit todt abgangen ist/wird nicht allein in Franck-
reich/sondern auch mit vns /als ein freundlicher vnd geselliger Kö-
nig betrawret vnd zum höchsten beklaget/ wird dadurch die aus-
teilung des Ordens mit dem gülden fliefs verschoben/ vnd
allerley mutation verfallen/ auch die Reise des Königs
nach Spannen in verlengerung gedeyen/
Danon zur andern zeit mehrers
vnd weiters.

85. 16. 82

200/587

✓



London 14

